

四庫全書

集部

欽定四庫全書

嵩山集卷八

宋 晁公邁 撰

古詩十七首

聞范道卿將赴試成都作此勉之

長來故倦游車轍環天下艱難不吾容虎兕適曠野世
方卧積薪敢獨怨飄瓦久荒小山桂幾葬蒲圃檟百懼
生不辰一死天所赦故交贈綈袍旅食悲冷炙將索長

安米偶中澤宮射倚楹日悲歌魯國疑欲嫁退慙一木
微安足支大厦收聲就泯默故意遂衰謝二年游諸侯
彈缺守代舍地濕恐鵬來常畏閼單夏官慙司馬巧學
愧齊人詐低回甘折腰俯仰甚出胯入遭妻孥笑出畏
官長罵一官終無成他日要稅駕買山誅茅草遠屋植
桑柘婦能躬井臼時饁南畝稼人皆見我窮連蹇足悲
咤往往怪范君何不老閒暇不知驥伏櫪風雲要凌藉
一日千里行汗溝沫流赭我方馭歛段敢追王良靶聞

君近舉子滿室光照社少年早乘龍佳境漸食蔗傑思
到班揚英妙等終賈被褐肯迷邦韞櫝久待價理無珠
遺海果見金躍冶出陳治安策去覽德輝下大才噲非
伍高論秦可借決科在此舉定取一戰霸勿為棲棘鸞
會見上金馬晚來秋風高木葉下清夜急令呼麴生為
我飲伯雅家貧無絲竹作詩助陶寫歸時更過我捫蝨
同倚樺

今秋久雨至八月望夕始晴月色尤清澈可愛

置酒月下作

玉斧琢月玻璃聲月中桂樹秋風驚終年待此一輪滿
不憂蛙食憂鼃鳴白鼃十日鳴空山雨師乘雲呼不還
黃塵曉漲三尺潦明河夜飛千丈瀾廣寒不復觀霓裳
公子豈解歌秋陽釜星未滅日已出風櫺雨隙棲清光
須臾紺繒展秋碧仰見西山銜半壁青天冥冥星益疎
光芒寒溢千山白今夕何夕誰與度舉杯屬月當起舞
陶然相對影凌亂不覺驚鳥起庭樹樹頭霏霏木葉墜

白露懸空斗垂地雖無絲竹為陶寫亦有鳴蛙當鼓吹
向來悲歌子桑子饑坐虛憂木生耳安知上帝思澄清
要令六合無泥滓

十月晦日同一屬官劉司戶師教授孫司理游
九頂山登萬景樓分韻賦詩得游字韻

今日當賜沐幸同官屬休於時輿梁成徑絕蒼江流山
靈念我來遂使蒙雨收林端膏澤滋巖際陽光浮倚杖
送飛雲列席俯滄洲所攜坐上客不減枚與鄒被服玳

瑁簪辭華珊瑚鈎樽中瀟湘清引滿更獻酬欲觀南東
畝往登西北樓其下島嶼出淒然洞庭秋將歸各賦詩
聊復記此游

哭盤石墓下

種木已大拱今年初一過方持斗酒奠其若下泉何寒
日墟中淡悲風冢上多一為知己慟淚濕石盤沱

寄師會三郎

青松初生在澗阿未聞託根附女蘿女蘿弱質安足恃

奈此歲晚風霜何我觀婦翁念汝婦亦知阿翁昔念汝
阿翁之恩那可忘明年歸守五畝桑勿使父老祠桐鄉

聞稻有成

庭柯不搖綠蔽空西風未回尚南風香稻既收八月白
晚花能開百日紅安排物色慰年暮流落天涯嗟路窮
炎江熱石那可觸少待征帆駕歸鴻

竹醉日

塵埃蓬勃欲障天畧無爽氣北牖前五月風炎竹尚醉

九衢日長柳亦眠
小兒畏熱書頗廢
老子罷食夢相牽
桂漿蔗飲不解渴
汲盡百壺冰井泉

贈師傳郎

盤石山深鳥相呼
常憂草木侵樵蘇
子孫存者亦牢落
安得上冢來鴻臚
憶初起家聲烜赫
翰林主人嗟莫及
只今若使翁不亡
再試南宮期第一
傳郎十四如我長
骨骼已似能文章
阿翁穿楊有舊箭
傳乎勉力不可忘

秋日送客梁山道中

白露下木末寒蛸抱枝鳴道旁幾官樹稍稍棲烏驚不
知何為爾蕭瑟來秋聲遙山歛暝色涼月含空明吾其
及清夜登車可徐行露幘受新爽風襟逐輕塵兀兀寄
殘夢泠泠析餘醒東行二十里斗落參復橫晨光明紫
霞銀潢淡疎星吾行不可緩曉復塵沙生

喜陳行之病起

閉門莓苔青欹枕風雨秋白日稍覺短急景逝不留鳴
蟬尖舊響高槐老新柔弔古哀九辯感今懷百憂是時

甫七月大火方西流陰麓懸暮色停雲掛空愁涼風颯
然至有聲在林丘蕭蕭吹遊子意已思良裘隱几默不
樂讀書將安求豈無三益友共此百尺樓陳郎漳濱卧
久闕過我游朝來見顏色厥疾云已瘳自茲可來往笑
談更獻酬不憂飯成糜相約劒買牛誰能與此世顛倒
同薰猶

西風

西風何時來秋聲已蕭瑟卧聞庭前樹終日鳴策策雖

云未搖落慘淡損光澤官槐脫高花穉柏矜獨碧感茲
歲婉婉客路尚行役病骨感秋氣瘡癘苦見迫蝸牛猶
自庇狐兔亦有宅抱病寄官舍意氣非復昔顧無揣摩
才胡為諸侯客

醉歌行贈閻丘伯有

昔別我髮青如葱再來兩鬢真飛蓬怪君五十面猶紅
答我有婦賢梁鴻澹然意遠態甚濃乃有謝家林下風
詩書圖史仍兼通豈惟刀尺工削縫入門不憂四壁空

要使我樂忘其窮終朝舉按歡笑同方牀曲几陳座中
紙牕雲母明房櫳華堂雖未掛桑弓兩女雜佩琥珀龍
大女已能繡芙蓉小女解唱風入松事夫如賓顏色恭
歲時稱壽曲三終自歌鵲巢詠阜螽正須富貴報汝功
何時執戟明光宮只今西州兵馬雄盍往獻策西平戎

燕閒

四無市聲身燕閒更居高明益清安銅餅水冷碧井凍
冰漿飯香白雪寒味毋致和夏小正仗當早歸漢從官

此身不願奉朝請但願常甘藜藿盤

合江縣舟中作

春江漲黃流漸沒灘上石是時三日霖隴麥半腐黑四
顧雲氣昏江樹生遠色蒼茫何所辨目盡千頃白汗漫
若无際空濛如有靦蕭蕭雨中帆正此遠行役馮夷喜
我至歸路風愈力中流浪為開蕩漾放舟入恍疑瀟湘
游白蘋了無迹故人樓中望天際應可識

三月二十九日舟中作

今晨天氣佳晴光被茂草草際含餘滋粲然泣清曉舟
師催解纜及此風色好江神似相予扁舟若輕矯

病中一首簡陳行之


岡陵雖坡陀其下水所積山通巫峽雨地類長沙濕太
陽豈不照浸漬本膏脉氣蒸柱礎潤暗起牕戶黑老屋
生菌衣陰墻上苔色不知今何時寒暑晝夜易邑人安
土風特不宜北客我初忽不戒詩酒頗自適艱難出一
語不博萬戶邑竟坐傷天和兩卧漳濱疾急求三年艾

幾墮衆鬼域自惟形羸甚固易中膚革昔年見君至豪
氣非我敵謂將獨免此不受瘴癘厄胡為亦效我傾倒
弄翰墨吟哦彫肝腎辛苦出鈎棘邇來亦抱病發作乃
併日滌胃無全功徒薪有上策意其水帝子欲君更竒
出手掉芙蓉旗聊爾一戲劇庶聞譴瘡篇相將還白石

雨

浮雲起層陰空中薄為霧簷端雨聲寒客子念遲暮祝
融如昨日白帝已更御寒聲傍絡緯秋意入庭樹六龍

疾其驅歲月不吾與
婦子催授衣荒城聞砧杵



嵩山集卷八

欽定四庫全書

集部

嵩山集卷

九至
十四

詳校官起居注主事臣顧宗泰

主事臣呂雲棟覆勘

總校官進士臣繆琪

校對官中書臣王家賓

謄錄舉人臣武先振

欽定四庫全書

嵩山集卷九

宋 晁公遡 撰

律詩五十五首

至漢嘉簡李悅夫

一別相望費歲時
感山父老至今思
才高方朔三千牘
名配韋郎十二詩
論薦久聞章奏上
推遷獨怪壘書遲
少留剩看平羗水
更繼風流太白詞

示健為李令君

悻直每疾惡淹留無徙官性雖與物忤吾獨惜才難垂
老須聞道為邦貴在寬君宜念此語衰鬢各霜殘

送梁子輔赴召

始見擢高第即當登赤墀今聞一節召已恨十年遲聖
主圖興造諸儒合論思此行宜努力勿復負清時

今日朝廷議如聞少及民諸侯無患楚三戶可亡秦但
使誅求減常令貢賦均荒年免離散率土盡王臣

漢廷日徵召舟楫去紛紛行路子所見成功吾未聞故
人期此去聖代用斯文會使如椽筆書勲繼典墳

簡謝達夫

吾識宣城守又違之一邦相看知雅曲必解賦澄江温
厚氣無雜衰慵心已降舉觴喜見屬親為撥春缸

寄李仁甫

守地難越境弔生寧及哀自傷轉蓬遠莫致東芻來慘
日熙夏屋悲風號夜臺遙知倚廬處流淚漬蒼苔

李悅夫劉文潛坐上醉歸作

將老尚逐食相逢聊舉觴
貧非原憲病酒發次公狂
未至世臣國先登君子堂
誰能更拘束短髮已滄浪

贈張聽聲

張子目盲心不盲吾知胸次有人倫
眼光安用如巖電
白首王戎不識人

論士平生妙入神是誰無此耳輪
困喚鍾作瓮皆堪笑
自是渠儂聽不真

自恭州之眉陽相送者六客意不可忘以詩為

謝

所得乃三益相從非一朝龍方卧隴底魚肯似陽橋月
看玉奩滿風吹金燼銷少留吾亦住不待楚詞招

贈朱師軻朱奎父

洛陽盛人物喪亂亦南遷今見大夫後猶如翁子賢端
居送日月秀句寫風煙相遇何匆促臨分重惘然

置酒北郊外送張真甫還什邡

高木已在望不妨寬作程相看愁饌徹未用遽杯行春
暖姜肱被川平雍齒城遙知喜公至雞犬亦歡迎

東津

東津草生花未開西山雪消水欲來玻璃江盡不受垢
蒲萄酒濃初醞醅啄木喚君有扣戶提壺勸我勤舉杯
春能幾何看即暮一月杖藜須百回

龍爪灘

龍爪灘前江水平暮頤山下春草生白石既出細可數

雜花初開遠更明日落盡見樓閣影天晴易聞鐘鼓聲
至今回思三峽路蛇退猿愁心甚驚

十二月八日雪

桃杏顏衰不解紅朝來飛雪舞回風東風似與加前拂
病葉枯枝一洗空

登梁山縣亭

舉觴自起勸西風吹盡千林木葉紅遮斷前山渾不見
恐妨極目送飛鴻

感事三首

中原者舊老江東淚灑軍前草木風巫峽山高苦霜雪
附書那有北來鴻

長安摧堞有烏聲草木猶蒙戰伐塵應念關中不忘漢
至今遺老願王秦

常恐東南驛騎疎每逢人至問揚都深知白部心輕漢
終倚黃旗運在吳

江上春漲

久坐思行樂茲晨強出門
菰蒲荒少岸桑柘遠知村
波急春濤大山晴午樹昏
每來成獨往佳處與誰論

送王師厚

宿草丘邊手自耘
輟耘過我意良勤
可憐一語未深接
借問去來何見聞

季父高名映里閭
復欣千里識名駒
當令東海評清譽
他日還如二大夫

照上人去破內游吳下十年而歸
眉宇炯然無

復瀘濮間氣喜作二解贈之

幾年持鉢下瞿塘
踏遍東南古道場
鄉里再來人不識
碧瞳白頰帶湖光

吳帆却入瞿塘破
草樹連雲山四圍
想見同來木上座
怪君何苦復東歸

過圓覺院簡照上人

一洗糟粕地再聞鐘梵音
前身老東院具體小西林
自昔知味少于今無巷深
是中有妙理直下試參尋

近承琮上人問訊甚勤老懶不能作書以偈答
之

食時持鉢乞諸隣不用毗耶遣化身想見堂中慙此老
法輪未轉轉饑輪

世界猶如露電身更於空裏聚微塵何時麥積崖邊路
說法重來要度人

十年不到吳溪上聞道禪龕更斬新得見山中此松老
後來誰是住庵人

次韻謝石教授喜雨

天子齋居坐法宮，萬方都屬指揮中。
敢安無事思樂泮，方戒有司歸在豐。
每念三農皆望歲，直期九月始休工。
知君亦喜連宵雨，與漲詞源更不窮。

次韻謝張德粹主簿

久知經籍總皆通，萬卷縱橫在腹中。
占雨正當求管輅，藏冰更欲問申豐。
每慚列爵來分土，未辦通商與惠工。
君自還家歌樂職，大碑深刻示無窮。

雨中登披風榭望東山

岡嶺逶迤草木低東山好處我能知
色濃意遠真堪畫
須在冥濛奄靄時

方塘

清陰布幽徑綠水溢回塘
筍長露漬粉蓮開風壞粧
坐多惟踵息躁定自心涼
學道今始得願生真有方

年侵

年侵慵更甚帙亂卷還舒
衰白愁看鏡雌黃倦校書
臨

風知地爽映日愛牕虛近報畬田粟誇邪亦滿車

庭下荔子熟

脩枝密葉總扶疎小摘登盤置坐隅翠蓋高垂張葆羽
赤繒全皺裹明珠不勞漢侯十五里可壓越人三百株
欲與銓量立題品豈惟當使橘為奴

劉文潛以荔子并詩見寄

十里為一候奔騰南海來封章伯游切詩句少陵哀異
縣歲月改前年霜雪摧筠籠今遠寄珍重手親開

侯革以詩見示次韻

少陵有幽事止共阮生論把酒與賢樂為邦慚主恩
欵傾賓客坐知出聘君門勝識中郎面區區對虎賁

送劉文潛如吳下

已聚糧三月聊為客數旬吾難留逸駕此去立通津
聖主坐中具嘉謀思上陳請言堯舜道第一在安民

隆州道中

冉冉晨霧重暉暉冬日微草黃迷犢卧水白見鷗飛在

野樵牧少閉關商旅稀妻孥屬長至遙想望吾歸

送張君玉赴寧江幕府七首

冠劍堂堂仁壽公昨提金鼓去平戎惜君不往分一矢
共射佛狸江水中

莫言地近嵩昆明刺史題書筆不停解道澄江淨如練
空濛山水是昭亭

子去夔州頗自矜舉杯大叫氣憑陵新詩硤內流傳滿
今有高人王右丞

來守劔西三里城胸中豈止俗塵生簿書堆案惟思睡
見此魁梧覺眼明

遠景樓高風月清酒酣要看筆縱橫山川有待君知否
可是東坡賦不成

衆水爭流赴硤中輕舟東下疾飛鴻流金不信人間熱
知有長江萬里風

江聲洶洶雷霆硤山氣蒼蒼雲雨臺白髮拾遺吟不盡
分留物色待君來

鮮于東之晉伯之子贈詩次韻

微風獵樹有佳聲一榻無塵戶牖明已擘荔枝憐玉破
更開瓜碧嚼冰清

堂上詩書抵萬鍾席間罇俎是千峯蕭然更聽松風曲
喚起江東阮仲容

高簾不卷戶長開須子時時著屣來一坐清風生白羽
九衢烏帽失黃埃

尊前每誦赤壁賦如見當年禿鬢翁誰謂流傳到喬木

果然遺響託悲風

一掃浮雲萬里空
月華都在野航中
葛巾藜杖勤相過
共賞芙蓉四面風

資州太守知衰懶
日日倒床惟睡濃
走送甘鮮三百顆
似君風味喜相逢

寄查元章

一別三十載
再來聞未聞
割鮮煩唱我
舉酒欲浮君
辯口霏木屑
醉顏生纈紋
相從能幾日
明發重離羣

喜見呂元錫聞往謁李仁甫奉簡短作

關塞三峩北山川五渡西喜逢連璧友

時與伯
渾俱

來自釣

璜溪先世施行馬高才滯割雞平生李元禮好士必提

攜

嵩山集卷九

欽定四庫全書

嵩山集卷十

宋 晁公邁 撰

律詩五十六首

王伯厚以詩招伯渾次韻同往邀之

憶昨歸來萬里遙不能對策未央朝
山林得計成長往松石為朋是久要
痛飲肯來同榼挈小詩聊遣當弓招
請君莫學全椒老澗下辛勤捨墮樵

師伯渾用韻復次

束書歸隱不辭遙庠序懶陪耆老朝野外卜居無鬼瞰
山中誓墓以神要暫來同作荔枝社安可輕違桂樹招
已遣官奴理琴瑟豈惟百戲但歌樵

再賦

風俗相傳三近古作成況自聖明朝藏家文字本蒼史
繼世子孫非黑要近報漢廷頻詔下時聞蜀士有旌招
怪君尚爾衣逢掖獨向空山伴採樵

背郭深通一徑遙
奔流坐看百川朝
飛來黃鵠陂已復
歸去白鷗盟可要
益部官曹寧久處
津鄉書札近相招
此生若有躬耕地
白首甘心老負樵

再賦

古者諸侯今牧守
衰遲難強歲相朝
惟須稚子理簞笠
兼有老妻縫襪要
來歲定從田父去
飛書不待故人招
平生最愛津鄉聚
江小可漁山可樵

東望行都絳闕遙
老來筋力倦趨朝
誰能作吏沈簿領

但欲買田書質要雅意庶同高士傳不才難望大夫招
津鄉舊有先賢宅過者翦莢莫敢樵

再賦

筋力何堪道路遙難陪諸彥侍同朝初無計上三年最
況敢功思萬里要北塞單于皆入貢西山贄普不勞招
傳聞已卧清邊鼓塹壘長閒守木樵

日翻蠹簡書齋裏往往編摹自漢朝雞距東毫來武信
馬肝琢硯出高要時因撫事歌成相更復懷人作大招

知子山中富吟詠縱橫文力到孫樵

去通義按刑漢嘉至中巖師伯渾臨別於此因

成二詩

慚愧居士屨遠來尊者巖深知煩露宿徑為落風帆潭
淨魚堪喚花殘鹿罷銜堂中有耆老禪病說呢喃

相送自崖返忍看騎馬回故情真獨厚疊鼓未須催此
去無三舍相留盡一杯風林如惜別撼撼暮聲哀

次韻鮮于晉伯清明日過水南

盈牋寄我送春詩不減風流杜牧之覓句已應兒輩覺
論書那得外人知如聞此上三年最相過能成一段奇
況及霜天宜把酒四郊物色勝花時

又

又賦斜川五日詩行將去此欲何之一年春事倉庚報
萬里鄉心杜宇知筆力早衰無痛快詞源漸老乏經奇
文章子駿惟君似學到揚州刺史時

歲盡

歲盡餘一候年侵懷百憂人生漢南樹節物劔西州風
榭梅花委春杯柏葉浮
我眉有佳色領覽為登樓

師襲卿來權攝我眉縣祿東之來乃去送以詩
乃元日也

白水諸山翠作堆豈令飛鳥著塵埃勿嫌屈子我眉縣
正得同吾婪尾杯淑日升堂迎晝永和風排闥送春來
還家尚可為親壽柏葉清尊手自開

送湯子才

江湖此去水連空萬賈連檣浩渺中帆影浸斜青草月
笛聲吹盡碧蘆風未論魏闕功名近不與巴山氣象同
更到臨平看輦路沙堤十里軟塵紅

聞虞叅政至玉屏山

宣室思賢久鋒車促召還去調金鉉鼎來別玉屏山拱
木雨露下豐碑天地閒九原凜如在想足慰慈顏

鄉黨敬前輩朝廷尊大儒公無念丘墓人自禁樵蘇此
去居衡軸長留執事樞求賢養邦本深為贊吁俞

示中巖長老子文

案此下古詩三
首原編誤入

我為應真來欲結無生緣不食中巖飯但酌中巖泉莫
言一杯水實具五味禪請師問應真此語然不然

子雲

子雲世所賤既死名乃傳至今讀其書共言以為賢必
待成丘壠何如用當年貴耳不重目斯人真可憐

蔡光祿

白頭蔡光祿不肯拜司徒滿朝愕相視蓋是時所無負

乘初莫責循牆乃當誅古書若盡信夫子實欺予

江行

瀘南道窮復劔西桃花浪生行苦遲百丈牽舟上春水
三尺為邦逢聖時平蕪細麥綠相映老樹雜花紅已衰
我眉山月今始見令人絕歎謫仙詞

木犀花二首

粟玉開花顏色新秋光未覺減陽春蕭然不受風埃澆
知是高標可辟塵

滿貯彫盤可鎮惟論花壓盡劔東西豈惟鼻觀遭渠惱
鄰舍聞香亦駭雞

楊叅政挽章二首

學海波瀾潤人間爵齒尊南宮冠多士東海起高門請
去三公府歸休五畝園何須篆幽石天下有師言

亟上疏封印空馳會葬車山川渾不改氣象比何如德
行太常議功名惇史書平生所薦士豈復減嚴徐

清明

便覺近長夏溫風蠶欲成冠歆知髮少衣薄喜身輕初
荻青穿水繁陰綠滿城朝來試新火茶鼎聽松聲

晚望

遲日高樓上江山引望長浮鷗輕浩渺飛鳥滅蒼茫洲
渚蘋初白陵陂麥未黃流年太忽促轉燭過春光

聞李士舉宿馬鞍山

入境封人報飛書侍史還初聞虎節使已至馬鞍山霽
野風煙麗端居日月閒此行吾所羨脫屣簿書間

江上

江淺晴沙見山高細路分老藤維墮石遠樹掛殘雲燕
鴈遙難到巴鷺暖遂聞花飛少顏色委地自紛紛

春日

花發春連屋山晴晝滿樓所過皆異縣何處是皇州顏
頡鶯銜逐呢喃燕聚謀物生各有累於世孰無求

野亭

興發尋春去寧知行路賒簷牙啄晴漢屐齒散平沙風

偃陵陂麥雲垂間道花芳菲看即過留滯改年華

挈榼

挈榼吾何往閒臨積水邊
晚紅看落日春碧愛晴川
蜂蝶低窺酒鳧鷺狎近船
平生五湖興見此一欣然

出郭

出郭花相引尋荒草欲迷綠
低憐獨卧紅缺見鶯啼
溪石皆堪坐山醪亦偶攜
淹留送落日直過石城西

合江舟中作

雲氣昏江樹春流沒釣磯如何連夜漲似欲送人歸亂
石水聲急片帆風力微舟師且停櫓鷗鷺畏人飛

江雨

江草被霜槁江雲隨雨飛稍看霑徑濕故作映空微曉
浪初吹浦春泥未汚衣南征羨鴻雁獨有故鄉歸

出郊

寒江多石出危岸有沙摧短綠行穿麥高紅仰嗅梅故
人能共往勝日可頻來春事從茲始羣花次第開

小立

小立臨洲渚徐行過野亭
顏沙江沸白穿徑草分青
秩酒近無給窮途真獨醒
春來慰羈放幽絕賴郊垌

梅古

微陽回孤根霜雪破餘凜
顏紅發春鮮膚粟憐夜永
輕風送幽香缺月散清影
寒鳥忽飛來伴此一枝冷

中巖十八詠

慈姥巖

棲巖既下集賓天復上征八子似荀氏中當有慈明

羅漢洞

釋迦行中國設教周孔同吾知諸子弟不殊闕里中

喚魚潭

潭水清見底老僧來喚魚與渠同法食持鉢施齋餘

寶瓶峯

誰將巾瓶來置此几席間不可喚木樛試往問瀉山

虎頭峯

山靈亦自喜尊者乃吾師得與鷲嶺並不作虎頭癡

盤陀石

飛廉日掃除預知尊者過不令有塵垢汚此石盤陀

風穴

有風地鳴籟無風石抱雲上人如宴坐不可墮聲聞

瀑布泉

濺沫響空谷分流清法筵元因卓錫地今為洗鉢泉

望江亭

偶來俯滄波遙見生白蘋望望不得上笑彼涉江人

玉泉亭

徘徊立泉上誰敢酌寒清莫解金鑿落且聽玉琮琤

松風亭

皎皎石上月颼颼松下風清絕誰領會倚杖送飛鴻

應現亭

松道須雨灑山扉遣風開塵念自起滅至人無去來

寒峯軒

崖陰日慘慘石潤露溥溥何似藍田下高並玉山寒

碧筠亭

蕭然一叢竹何當舉似人不可妄認此青青為法身

石筍庵

竒峯如立筍太陰生古苔誰能此出入咄咄金石開

壁軒

卷書置案上默坐初不看待者空堵立湛然惟壁觀

止庵

智者有所說後生誰究明韋編具此眼時止復時行

西方閣

官失學四夷寂寥洙泗濱至此每再拜西方有聖人

嵩山集卷十

欽定四庫全書

嵩山集卷十一

宋 晁公遡 撰

律詩五十二首

前恩陽尉周邦舉出予兄激仲所書其父竹軒
記求詩因題二解

眼看數竿今白頭高標直節氣橫秋果能似此孤竹子
何羨渭川千畝侯

俗士曾中數斛塵此君偃蹇不相親當年曾識子猷面
大令今來是故人

園中二首

南北東西極目天看天不比下牢關遙知前面山尤遠
直到飛鴉滅沒間

眇眇周垣總路平森森夏木已陰成却疑身在華軒上
翠幄中間曳杖行

用薛郎所寄示詩三韻

子勿謂毛穎渠言何使余遙知生白室誰助殺青書
墨漆相似蜀牋霜不如殷勤遣分寄吾汝與同車

阿傳議酒食察貳更廉空開甕鳴頭綠磨刀魚眼紅報
功他日在食淡暫時同富貴行自致聖時無道窮

薛君昔在日才可齒諸任繼世能傳業為文有嗣音
千秋當却老六籍更鉤深何以壽吾子高才無陸沈

請緣老住持象耳山有詩次韻

朦朧兩眼著玄花認取空中起滅華我是官曹老龐蘊

終無瞎棒與盲枷

中巖尊者幸同堂浪走諸方有底忙若道渠儂棒可畏
新羅未過合思量

送王章赴長寧通判

仰事各黃髮今為閭里榮共看朱紱貴更益綵衣明泥
軾幸小駐羽觴當緩行期君如石建烜赫漢西京

次楊國材韻

形模豈稱侍承明不願簫韶聽九成但願豐年有高廩

千夫獲稻看秋晴

耆年何在隱牆東
常樂簞瓢陋巷中
白首可無知所自
宜歌帝力頌天功

師廷珍以詩見惠因用其韻

欲平鞞鞬與堅昆
下詔旁求闢四門
吾子莫孤明主意
建隆開國聖雲孫

蒼苔半蝕蔡邕碑
今日中郎有女歸
莫怪昏昏暗丘壟
浮雲淚濕不能飛

詩禮初聞衛尉旁起家期擅蜀文章快吟芍藥常階句
刺看芙蓉別殿香

王元才甥見過其弟元濟甥繼來有詩次韻

把酒悲歌望蜀天感今懷昔重悽然道堅或謂如無忌
靈運還欣對阿連他日鵬應自鷗化此生蚊豈待夔憐
筆鋒刺淬猶錐利明歲文場破兩甄

宇文紹恭所藏其父德聞手書其祖家訓一卷

蜀士相與語故家誰得如千年令威宅一紙伏波書

曉望

城上高樓出女牆遙看初日尚蒼涼
松邊浙瀝風成響草際晶熒露有光
樂歲共歌羊考牧新春不與雁還鄉
聖時願報收輿地快自襄陽下洛陽

李士舉見寄次韻為謝二首

忽鼓破中權來從渝上城何為向南畝
本合侍西清樹色行相引灘聲鳴不平
青城有仙伯往矣授長生

想見山靈喜如看柱史來江清無急碛
野潤失飛埃行

攬孟博轡再然安國灰相過忍遽別莫放錦帆開

師伯渾以詩告別次韻

閒居何不樂非願世兼收利乃庶人意道惟君子憂野

花開北陌官酒酌東樓

嘉州酒名

故里有書至應言無久留

此去即鄉黨子寧無友生不堪今日別真見故人情杯
覆葵花小尊傾竹葉清送行須盡醉兼為破愁城

楊復先寄荔子仍和予昨所贈二詩因次韻

林間熟丹實葉底綴紅雲並舍皆好事絕甘能勸分扣

門知使至登俎覺香聞更與詩爭麗紛披錦繡文

嘉果喜三嗅名園思一游駢頭丹殼皺繞指玉漿流味
壓乾腍子韻高蕭灑侯安居日啗此邊猴幸兵休

遙想載酒客時來從子雲山高去天咫尺永惜陰分秋
稼田畝接夏弦閭里聞草堂無數出猿鶴有移文

野色正如此廢書時出游山吞落日盡硤東大江流俗
駕謝逋客郊居如隱侯愛君吐佳句落紙不能休

書齋

廷尉已執天下平更出一節令循行時清斷獄歲大減
小臣何功君聖明紙牕風破夜自語瓦溝雨來寒有聲
官閒無事但宴坐滿室惟對書縱橫

離南平

晨光慘慘雜微霄寒水濺濺更斷橋風隕栗房開紫玉
煙蒙蘿幄疊青綃官曹已畢三年考客路深嗟萬里遙
從此揚舲下巴硤新年當及未央朝

西山

萬州城西何所有高山其下俯寒塘浮鷗藉草溪沙暖
飛鳥衝花野樹香他日擬從南岳隱平生尤愛北牕涼
道人為我收松子剝種清陰十畝長

至日留滯荆渚同鄧氏兄弟飲酒

今日當長至窮年尚遠行野晴春草細江晚夕陽明衰
病依僮僕經過得友生濁醪來近市堅坐且徐傾

行李

路出蒼江上雲生亂石間中年幸強健今日試躋攀湍

碛寒鳴地頽陽暮
隱山僕夫問行李
早晚遂東還

碛內

碛內收多雨沙邊慘積陰
龍吟殷地遠虹飲入江深
不作山林去非憂荆棘侵
經年困奔走無力更登臨

聞笛

落日卧鄙塢忽聞吹笛聲
天清孤鶴唳江淨蟄龍鳴
谷響風時下山高月未生
誰能永今夕呼酒與同傾

掃徑

掃徑通春屐開林啓夕扉浮鷗避人去輕鷺引雛飛尊
俎深留客風塵漸息機不妨坐至晚少待月同歸

山行

白沙素石淨無泥橘刺藤梢已不迷牛放遠山連鴈鷺
蛙鳴廢沼下鳧鷖終年去國空彈缺盡日看雲且杖藜
久客諸侯成底事幸逢寬政免推擠

江邊

素石寒沙共眇然荒城古木暮雲懸空山靜谷鐘聲遠

落日晴隨樹影圓
屢報傳烽沈塞外
時來倚杖立江邊
東南耆舊今安否
欲寄新詩誰為傳

江邊日日強登臺
越柁吳檣久不來
投迹東巴留萬里
側身南極望三台
公朝遣使丁年去
丞相疏恩甲第開
聖主得賢如作頌
微臣愧乏子淵才

郊外

草盡春泥綠花乘晚照
明遙山先暝色平野易風聲
歸沐休形役深居感物情
據鞍聊一出佳處得徐行

春畦

水滿春畦白雲連晚照黃野花時結子溪柳不成行客
禮容吾懶酣歌與世忘晚來得新句吟罷立蒼茫

漢川

道路通襄野風煙近楚天地卑荒巨澤山斷見平川舟
楫自此去音書誰與傳西南是巴峽應盡落霞邊

大冶縣見梅

客裏逢春色江梅發故枝正應傷老大似欲慰棲遲雪

樹真相引風花莫倒吹南來愧何遜吾病不能詩

正月二日至九江過陳漢卿

行路傷徂歲思家佇遠情雲迷五尺道春動九江城者

舊無元亮交游得仲卿

漢卿慕王仲卿
為人故取其名

尊前見芳草已

似喚愁生

夜

樹合春城暗江鳴夜碇喧艱難猶此地漂泊更何言
再輕煙集輝輝列宿繁巡簷望南斗無路入脩門

官舍

雨徑蒼苔滑風簾翠篠斜
邑居藏萬室驛道接三巴
曉堞調清角春庭放早衙
歸休幸無事隨意酌流霞

晴野

草色熏晴野溪痕上白沙
鳴鳩行哺子晚樹續開花
多事真堪厭浮生每自嗟
坐來歸興動城郭欲吹笳

偶作

官居復何有幽事亦堪誇
高樹行春蔓疎篁上晚花
常

年皆作客隨地即為家尚想關山路傷心故國賒

雨中過祁門十里不能進宿旅次

今日祁門縣衝泥怯遠行含風雲葉細間雨雪花輕溪
晚白鷗下草寒黃犢鳴吾今更何往漂泊愧平生

旅宿

漠漠破雲亂冥冥汀露微鴉喧得食喜鷗近畏人飛旅
宿天涯滯心期歲暮違滄江聞已漲似欲勸吾歸

歲暮

晴峽開寒浸滄波
逗遠光年華已衰謝
春意尚微茫
久污功曹掾
終慙謁者郎
南方誠瘴癘
經月或無霜

沙寒

沙寒蕪白石
灑斷入青溪
破霧連山暗
江雲出水低
遠游殊俗倦
歸路故鄉迷
日落荒原上
城烏已復啼

江流

江流日日上
平蕪細徑侵
沙漸欲無
嫋嫋紫苞開
露筍森森青
節亂風蒲
晴川默數
千艘過深
破遙看一
水趨

傳道南檣有歸使晚來失喜問揚都

偶成

離離樹影晚仍疎寂寂禽聲暖自呼
雨埵蓄糶來聚蟻
風簷壞網落懸蛛十年空誦歸田賦
萬里試披輿地圖
老向人間定何許只今湖海更南隅

嵩山集卷十一

欽定四庫全書

嵩山集卷十二

宋 晁公遡 撰

律詩五十二首

李仁甫將至郭下以詩迎之

公館可休舍良宵宜對床肯汗白雲屨來過碧瀾堂置
饌同三飯開筵累十觴涼秋當泛菊小住擷微芳

次韻李仁甫

北牖厭高卧西山思勝游詩人少題詠物色盡分留小
憩青城夜幽尋丹景秋何人與同往二老實風流

中原

中原北望連虎牢遺老畧皆死草茅蕭瑟千秋萬歲殿
塵埃四通五達郊無人雄心肯出塞何日戰骨與封嶠
三軍歲歲費供給但聞邊庭峙芻茭

節往

節往天始肅地炎霜尚微靜聞木葉下晴見荻花飛積

水蛤猶吠並隣雞正肥孤雲吾所羨獨有故山歸

石判官惠詩用韻為謝

吾宗衰謝尚斯文長抱遺經教子孫海內世家慚衛史
壁中編簡即齊論交游幸得二三子毀譽當如六四坤
肯為清談飲一石絕勝雜坐獨留髡

簡任李明府判

昔別嗟何往今晨問始知茲為泛舟役端若赴襟期夜
雨霑桃葉春風在柳枝相逢不同醉辜負豔陽時

逸樹

逸樹行百匝臨池把一杯
白知茶蕊上紅對燭花開
已作尋芳去何辭晝夜回
惡風無藉在明日滿蒼苔

游園

林陰忽忽已藏鴉
作急尋芳賞歲華
尊每不空緣好客
席無何鄉為隨花
開新合故從衣薄
度密穿深信帽斜
儻有歸休五畝宅
老夫著處便為家

他鄉

故國山川安在哉他鄉今復見春來蓬蒿並興草益茂
桃李不言花自開催促年華似推轂較量筋力試登臺
歸田尚可扶犁在明歲當驅俗駕回

與官屬往江上觀淘江

郊原漸看薺麥繁塵沙遠著榆柳昏花光照眼暖自醉
江聲入耳清不煩縣官作場相地利邦人防城醜水源
我將載酒勞掾史酌言酬之兩山尊

丙戌元夕

刺史敢云樂今非者舊初香醪秋露薄膏火曉星疎豈
止君不足誰能財有餘近聞寬賦歛明詔議虧除

看花

春到人間得幾時
可堪鶉鳩趣春歸
不辭日去千回看
便恐風飄萬點飛

布穀

南村北村布穀鳴
家家隴頭催出耕
道逢田父喜相語
四十三箇春水生

視通濟堰二首

野樹皆綠葉清江初白蘋偶來無筮日小出當行春人
頌勾龍社恩沾佩犢民橫江三百丈遙見石嶙峋

往年初堰壞樂歲亦民饑再見龍尾水如興鴻卻陂名
同召伯埭人立許揚祠祝史有祀事歌予迎送詩

細雨

細雨真宜麥輕陰似養花人烟隨土斷村徑逐溪斜大
道能方軌春泥欲濺車歸來洗鞞袴城郭未吹笳

新津道中

野綠平如案松青潤更加兩歧惟有麥一縣已無花日
色深迷霧江流淺見沙平生愛春事忽復過年華

郡縣

郡縣紛紛數代更循良少似漢西京未聞子產能寬服
誰見翁歸有急名所望家無空杼柚常令天不害案威
打門不怕催科吏願與君王竭地征

修覺寺

山遶象耳北堰橫龍爪西遙瞻蜀玉壘不減漢金堤未
合三江水仍通百社溪春流已可愛散亂浴鳧鷺

池上與師伯渾飲酒

冉冉煙生樹溶溶水滿池藻寒魚不食花暖蝶先知相
對飲鑿落不妨歌接羅還山何用遽同過艷陽時

寄李悅夫時監成都軍資庫茶馬司檄兼僚屬
聞近治胥吏數輩

賓筵聊可樂筦庫亦何勞近已尸鼠輩果能清馬曹晴

郊堪挈榼春事助揮毫借問浣花水只今深幾篙

恭州報恩長老宣公以四偈見別用韻為謝

再到叢林得我驚
斬新花果自然成
種田更有僧祇戶
乞食何如舍衛城

甌中炊米釜烹鮮
莫道巴兒不解禪
日日扣門來乞火
箇中已有一燈傳

大地八風初不動
老夫自駕鐵船行
莫憂船上不知曉
元有木雞來報更

海頭已白藏頭黑老去心情總不堪請唱德山歌一曲
却能打鼓似關南

次韻杜主簿

平生有志欲歸休老向殊方尚轉流五畝桑今如卜宅
千章荻可比封侯幾經峽口江水夜往看峨眉山月秋
終恐官曹敗人意不如一笠釣滄洲

喜簡元輔兄二首

元有不病者君無嗟遽衰閉門謝餘子扶杖看清時野

樹著花早春江生浪遲相過忍輕別小立為題詩

息女有所託衰懷寬老翁通家猶孔氏得婿似權公奕
世姻婭在平生憂患同追思九原友宰木亦悲風

白宋瑞

聖主思獻納諸公專討論吾生端有命此去勿多言往
泛碧萬頃歸來朱兩轡江湖自可樂不必上龍門

次師瓌韻

邇來才力愈衰遲說向諸公笑脫頤來對老夫何所見

歸求文字有餘師相期要作後彫柏自獻當同前列龜
莫學一官今潦倒白頭深愧伐檀詩

與客飲池上

脫畧簿書外按行池籞中
筍長風解碧蓮淨雨歇紅佳
客常契濶良宵難會同
巾車幸過我取別莫匆匆

次劉機將仕韻

承平玉燭四時和處處惟聞擊壤歌
富國不須搜粟尉
勸民當應力田科
使君身似社樗老故里賢如喬木多

今日九原誠可作吾誰歸者有東坡

六月八日雷雨大作喜呈張仲季孟

雲霧相纏暝不開披衣衝雨獨登臺風號曠野吹江立
雷擘蒼山震地來從使郊原昏白晝剩教草木洗黃埃
夜涼如此真堪飲喜折圓荷作酒杯

送李敞逆婦叙州乃予友悅夫之子也

初戲塗鴉壁今升莫雁堂真堪當寢齋已共乃翁長歲
月良易得詩書宜自強他時再相見兒女即成行

啗荔子戲作

已覺香皮腥染乾漸憂孰顆烏銜殘高攀上帝紅雲朶
笑撮仙人白玉丹

寄瀘南子止兄

杖鉞知何處看雲望欲迷真同阮南北各寄蜀東西峽
嶮水增急樓高山為低春來日行樂桃李想成蹊

呂子山楊廷仲廷試歸

布席三峨見升堂二妙來端須置尊酒一為洗塵埃翔

雪吳江渡薰風漢殿開往還雖萬里親得到蓬萊

謝人惠生日詩二絕

本將豪句慰衰遲開卷寧知起我悲獨對春風揮老淚
如聞人誦蓼莪詩

壽我新詩意甚勤此難專享要平分願從蘄子摩銅狄
可謝蘇公贈鐵君

夏夜

樹陰高下遶周墻靜夜猶聞刻漏長斗轉未離天北極

參斜已近月西廂

為邦

壤畫東西劔川分上下江論才難塞職逐食強為邦曉
起雨南畝晚來風北牕幽懷得陶寫賴有酒盈缸

眉州燕游雜詠十首

碧瀾堂

清瀾深幾許夏潦冬即空定非蛟龍宅徒為螺蚌宮

葵亭

杲杲東出日萬方被照臨鸚鵡不踰濟草木有常心

臨風閣

舉扇謝風伯排闥有清音不可遣塵汗但當開我襟

晚賦園

雜樹畧就列清晨時涉園逢幽付鼻詠懷新勞目存

披風榭

屏障盡通徹蕭然塵土空不畏趙盾日知有楚王風

起文堂

天地有萬籟中存韶濩音斯文未嘗廢但見古猶今

野航

方牀客常滿豈止兩三人誰可負之走長留採白蘋

芳菲亭

清陰夏可玩秀色春可餐桃李事且置四時各有觀

搗香亭

臨池可手攬何似湘水中冥冥望北渚木末有芙蓉

遠景樓

山川未為遠在此軒楯中我覺千歲近民今三代同

送李紹祖通判寧江

此去夔州氣倍增白鹽赤甲兩峻嶒喜看司隸李校尉
往事高人王右丞若使主公登紫殿亦歸郎省卧青綾
老夫只擬安田畝他日蒸民頌中興

嵩山集卷十二

欽定四庫全書

嵩山集卷十三

宋 晁公遡 撰

律詩四十五首

行役

胡為行役尚殊方已覺春容近艷陽石齒漱江翻翠浪
蔣牙穿渚出青芒艱難去國成淹泊老大逢辰倍感傷
幕府吾歸具朋酒兕觥猶及享公堂

樊口

林鳥晴自語水鶴暮知還故國浮雲外寒溪積雪間東
行臨赤岸北望阻青關石上窪尊在吾將酌次山

上都

晚歲辭荒塞青春赴上都望雲君日近犯斗客星孤獻
納看多士衰遲失壯圖功名吾已懶歸擬著潛夫

溪上

野老門前雲覆溪雨晴雲氣亦霏微水生蘆筍纖纖長

日暖楊花細細飛得食慈烏皆反哺卷簾乳鷺自知歸
天涯物色堪行樂況復淮西近解圍

春晚

苔色侵堦上晴光度隙來庭花隨鳥下池藻逐魚開舊
國悲銅雀新詩擬玉臺一春常道路歸即送春回
野樹交新葉春江上晚潮花泥粘落藥麥隴散疎苗輕
籟因風發游塵著雨消遙憐小山桂久負楚辭招

小築

小築何年隱巾車得再臨竹陰覆地薄樹影入池深雲
日清暉動山林暮景侵南枝棲未穩接翅有來禽

秋陰

出林雲未斷入坐雨初霑急點鳴高瓦寒聲瀉壞簷懸
牆閒玉塵散帙亂牙籤誰道幽居勝吾今吏隱兼

蜀江

蜀江楚碛鬱峽巖雲霧中蕪草木參飛鷗翻空投霽野
游魚跳水亂澄潭朝廷共仰辰之北羈旅長留斗以南

更欲暇時求勝槩每從隣叟恣窮探

立春

我來佇立望晴空目極蒼茫萬壑中樹色昏昏酣霽霧
江紋細細織柔風一行殊俗猶為吏三揖今年擬送窮
聞道東田耕帝藉慙無賦奏大明宮

江上春事

春來江上解霜嚴羣柏周廬筍出簷突兀狸頭蒙紫籜
參差龍甲長蒼髯閒思井臼高人宅懶傍車輿刺史檐

留滯殊方憂鵬入今年試為發書占

春回

城郭初瞻北斗移春回冰壑已流澌石林昔日垂寒旆
江藻舒風引細絲物色徐看催歲換形容先擬駐年衰
天涯草木雖無賴亦復欣欣及聖時

巴城

比從闔塞歷巴城不復衣冠立漢庭越舊江寒嗟獨往
瞿塘破險駭初經雙崖石立懸深翠萬嶺排空送遠青

久抗塵容驅俗駕往來吾亦愧山靈

清秋

清秋獨立望殊方粉堞遙瞻埤堦長水滿蒼江平巨碇
風交翠木亂寒塘滯留晚歲違公府準擬明年入帝鄉
多病早衰才不振豫慙無賦奏長楊

潯陽

渺渺蒼江遶郭流菰蒲杜若滿汀洲山雲不動飛黃鶴
春水無邊沒白鷗日落荒城聞戍鼓天清絕浦見行舟

老夫舊有相吳興聊復今年作遠游

郭外

脩林逸屋尚扶疎紺葉樛枝老不枯晴廡無風鳥自語
秋塲落日雉相呼一區未有子雲宅半世空看摩詰圖
終擬買田陽羨去肯浮滄海遠乘桴

趙主簿護貢篚至吳下有詩見示用詩為謝

軸艫千里薄樅陽未數當年漢省方勿為催歸啼望帝
且看奉引駕乘黃四邊每報風塵靜萬國同瞻日月光

我願與民歌擊壤求田當賣橐中裝

觀雨

高閣前臨野外村坐看急雨灑山根黑雲合沓奔崖暗
白水崩騰赴硤喧已快脩渠通草徑稍清瘴土淨柴門
晚來更報滄江漲津北津南沒舊痕

雨罷風大作

燕寢真宜雨卧聞風有聲莫驚無礙睡寧為不平鳴折
筍低行蟻飛梅暗打鶯最憐兩岐麥歌倒亂縱橫

江上

岸冷霜排草川明月上梅清游誠可愛深夜孰能來不
作尋山去難成訪剡回此生慙野老過往只田萊

白日

白日寒無色黃流漲未平雲低催夕暝江濁污秋清尚
覺物多累敢期詩有聲窮愁今至骨書或似虞卿

次韻程愿以十詩見示篇中多及故起居舍人
程子山老懶姑取其用韻答之

故鄉喬木莫知年，聞道端居似玉川。
勿謂魯侯吾不遇，試言衛政子奚先。
傳家學問三冬足，插架文書四庫全。
頗復因君懷柱史，當時高會有羣賢。

費子範以予銘其父墓，持錦物相餉，盡歸之。姑留洮州綠石研，一作詩謝之。

大費家聲星斗垂，乃翁名蹟世人知。
平生於此辭無愧，不減東京有道碑。

訟牒裝懷塵滿胸，少無筆力老尤慵。
洮州綠石堪為礪，

聊與襄翁淬筆鋒

王才諒歸自臨安備道羣從內集之樂感而有

作

豈料高陽里于今復舊游
風塵兩地隔江海一身留
夢斷烏衣夜魂傷白帝
秋臨平江上柳早晚繫歸舟

病中

官冷經過少門寒亦懶開
雨餘苔及榻病起研生埃
客淚隨猿落家書想雁來
似聞溪上柳一一報春回

立春有感

歲盡無人訪
汴州東風應到未央樓
荒垣草沒牛羊入
廢苑春生雉兔游
萬里艱難炊劔首
十年流落夢刀頭
一官何事不歸去
空戴南冠泣楚囚

感事

征衣消盡洛陽塵
泣向東風拭淚痕
不及青春歸有信
一年一別樂游園

木樨觀

離離荒草滿遺宮羽化無人殿閣空白鶴亦應天上去
獨餘枯櫪起秋風

層樓

獨立層樓上遙看衆壑中山頭冠落日谷口吸長風雲
霧吳天接江湖蜀柁通只今洞庭岸白浪沒青楓

溪上尋梅

凍雨霏霏不濕山水溪淺淺欲生瀾我來問訊無消息
笑倩東風與破寒

病酒

遣愁自笑筆無功
醉覺花梢入眼紅
本擬消磨付杯勺
不堪中酒過春風

喜雨簡仲霍行之

久晴風暖紵溪城
陌上輕埃欲汗人
不惜春泥三日雨
且消烏帽十分塵
霏微著柳空添色
浩蕩欺花便減春
擬作郊居雌霓賦
故人今日有王筠

簿書

楊梢飛雪滿城風暖日催花爛熳紅詩興消磨渾欲盡
一春心事簿書中

春晚

花輸落蘂歸蜂室風約疎簾納燕泥見此令人思故里
出門搔首忘東西

二月

只知流落倦飄蓬豈識朝回合殿風二月春容山色裏
五更歸夢雨聲中

門外春寒數日風登樓聊恃醉顏紅水浮渺莽春畦外
山在冥茫暮雨中

去八月同張文饒考試始遂言集執經問道至
今不敢忘因成二詩

屬者俱被命敕書黃札光同將舜權量與較蜀文章投
分雖已晚傳經何可忘對床風雨地長記此升堂
通變莫如易韋編存至今如傳仲尼手盡見伏羲心此
去被清問豈惟蒙賞音要通天下志觀象得惟深

二十七叔父書來說東都故居如昔

吳蜀相望萬里程
經年書到說都城
御溝猶泛宮花出
春草還依輦路生
京洛衣冠皆去國
東南父老亦傷情
鄭公鄉里聞如故
方信文章可避兵

讀江南諸公詩

吟盡江南草木春
只今臺閣有詩人
漢廷安用滄浪句
容我持竿詠白蘋

午睡

漸覺銅壺刻漏遲
捲簾花日弄晴輝
午牕睡美無人喚
夢逐游絲自在飛

南州

久矣吾人愧白鷗
塵埃無路入南州
愁橫蜀嶺何年斷
夢繞吳江盡日流
病骨本無軒冕相
微官端為稻粱謀
與君共約東歸日
江總還家要黑頭

官舍

得閒誰更傍人門
且喜深居少送迎
楊柳春風垂地影

芭蕉夜雨隔牕聲病寬束帶圍應減愁攪枯腸睡苦輕
明日公庭有官事又須持板候雞鳴

止酒

卧病經旬不舉觴胸中無復少年狂春心已逐飛花盡
午夢還隨白日長塵事無窮那可了詩情常在不能忘
閉門覓句無餘事書策紛紛正繞牀

嵩山集卷十三

欽定四庫全書

嵩山集卷十四

宋 晁公遡 撰

律詩三十五首

即事

故國邊聲靜鼓鞀依然宮闕淚沾衣
端門曉日烏聲樂別殿春風燕影歸
目斷楚天嗟樹隔夢回梁苑逐雲飛
里中父老今誰在聞說比隣半是非

寄子兼弟時聞有平都之游

春風殿閣百花香
欲去題詩細作行
聞爾東游有佳句
只應先我賦靈光

遣愁

白盡汀蘋老
黃彫岸草秋
西風正蕭瑟
何處不堪愁

巴江

巴江暮秋末
霜降千林空
山色不改碧
蓼花無數紅
木葉感湘浦
尊羹憶江東
艱難志當壯
吾未怨途窮

懷子薰弟時在寧江赴試

霸國山河在秋風草樹疎
羈游今幾日旅食定何如
夢想池塘句愁消鴻雁書
細思治安策勉力獻公車

又

江晚微收潦乘流久已歸
沈郎正多病水帝有餘威
鴻雁幾時到脊鴿相背飛
題書問行李東望獨依依

予已未十月二十有二日去涪上越明年八月二十有八日以事再來觀山川之勝無異於昔

而予之幽憂抑鬱亦自若也

重來閒曳杖藜行白帽依前似管寧風雨只如當日恨
江山不改故時青天寒未夕牕先暝霜晚無聲葉自零
詩罷時為洛生詠醉吟聊使故人聽

送王和甄竇公瑞歸魚洞

壁掛凝塵榻苔生嘯月樓喜聞佳客至能為故人留雨
積山川暝風傳鼓角秋沙邊晚相別留眼送歸舟

秋江

秋江水清不勝綠還與漢江顏色同望中白鳥忽飛去
落日丹楓相映紅

和郭安道

在試院作

水落灘聲急風來樹影移懶窮千里目空誦四愁詩白
帽何妨隱黃梁未遣炊要令鄉國夢暫向枕中遲

雨晴

西風送殘雨吹盡簷際滴稍稍江流清湛此千頃碧雲
收天倚蓋山靜月銜壁秋容日夕佳真欲慰北客

別郭安道盧能甫

客路悲秋落木邊
江流滾滾尚連天
病來懶著登山屐
歸去聊乘下瀨船
回首關河嗟去國
傷心風雨送殘年
相逢又作忽忽別
擬續陽關第二篇

偶題懷子兼弟

秋色丹楓畔
愁心白雁邊
東來又相失
更擬待明年

夢中作

舉鞭重到故都行
予亦咨嗟恨不勝
心與隴雲留漢苑

目隨煙樹遶秦陵

尋梅花尚未有開者

問訊溪頭樹如何殊未春亦應心老大不逐世陳新

有感

不見采愚闕于今已十春素衣不忍棄為有洛陽塵

雨中觀庭下梅二首

霏霏凍雨細無聲解洗梅花花上塵似與橫枝借顏色

故應添我一分春

春近梅梢著意紅，留花不發待東風。
籬邊一樹最佳處，半在冥濛煙雨中。

詠銅餅中梅

折得寒香日暮歸，銅餅添水養橫枝。
書牕一夜月初滿，却似小溪清淺時。

喜雨

提封為國守樂歲，見天心與此一年食。
賜之三日霖打，荷看急點。歷竹有清音，上帝嗟何遠。
昭昭寔汝臨。

三月晦日舟中

平生每欲惜芳菲
人事還多與願違
卧病不常同客醉
作詩才及送春歸

四月一日舟中

渺渺無風浪自平
順流乘曉放舟行
汀蘋不與春同老
池草能隨夢復生
山色向人元不改
年華轉景未須驚
故人相會無多日
有酒何妨為我傾

師安撫生日

鼻祖貽謀遠承家積慶長青箱元不墜玉樹久逾芳氣
驗三嵎秀祥占五世昌向來蜀父老久憶漢文章試問
風騷將誰登翰墨場浮雲玉壘變秋草墨池荒大雅淪
金石斯文厭秕糠九成方命舜三變必興唐東壁初觀
象南箕果降光終當薦清廟始驗出崑岡世喜韶音在
人皆肉味忘遙聞望帝國重立鄭公鄉議論看前輩春
秋守素王談經追服杜下筆逼班揚價重連城璧功高
治水航詞源傾滌瀕才刃劇干將思涌辭穿月文成字

挾霜高明齊日觀豪健敵風檣不但垂金甃方期兆玉
璜徑宜排稷下不用奏阿房退草三千牘深窺數仞牆
多聞正科斗博識辨商羊鄉黨尊王烈交游說鄭莊絃
歌化鄒魯文物見成康壯歲觀周樂昭時笑楚狂風塵
天下轍日月魏中梁星列橋門外霜寒壁水傍應書隨
漢傳鼓篋上虞庠大策先多士高談元老蒼諸儒甘折
角宗伯許升堂擢秀聯龍虎凌霄翳鳳凰西轡聊偃息
北海暫徊翔絳帳師儒室青衿弟子行至音消鄭衛俗

學起膏肓德業方天縱才名故日彰築巖宜夢說負鼎
可干湯憲古興華旦蒐儒列奉常魯宮傳禮樂趙鐸應
宮商金納諸侯酌郊崇上帝觴朝儀修草具廟樂紀芝
房方刺封中制將分岱岳祔守邦嚴典禮範俗正隄防
恩賜尚書烏班齊騎省郎明光聯執戟建禮入含香鳴
玉趨文陛垂紳拱御牀天臨豸冠動風凜獸樽涼禁省
吟紅藥朝廷少皂囊憂時惟賈傅疾惡甚張綱伏閣曾
留諫埋輪詎畏強忠言深慷慨直氣歛飛揚屢乞開宣

室常思請尚方馬皆貪立仗鳳獨見朝陽直道難容黯
羣臣惜渡相虛心忘寵辱知命信行藏徼道森長樂周
廬肅未央贅衣重入侍交戟儼開張地有長城固時無
寶瑟僵鳴鑿思禹穴飛旆入雷塘仗狩崆峒遠旌垂少
海黃方資清宿衛乃遽釋軒裳負郭俄回駕專城再耀
銜化移江北枳訟決召南棠已去浮江虎潛軀避境蝗
使車更刺舉夷路看騰驤未即歸前席還聞出護羌不
通五尺道坐富十年糧念昔東南帝多興楚越疆聚星

占晉國厭氣走秦皇往者何勞繼今王未易量布書垂
象魏仄席在巖廊大業雖中憤神謀正外攘會須擒頡
利方擬殄燒當宇宙依秦樹山河接汶篁再令宮禁肅
必賴股肱良豈久留乘塞行看入奉璋無安都護府亟
趣舍人裝有客彈長鈇終年竊太倉乘龍安敢望飛鳳
果為祥貪祿難投憤登堂阻奉觴遙期千歲壽坐見海
生桑

范令人生日

文正垂芳久風流八葉蕭名傳慶厯頌功冠寶元朝人
物追三代儀刑正百僚後來登玉筍故自有霜條配德
皆乘鳳生賢必珥貂賦高梁苑雪聲振浙江潮已慶生
金社俄聞夢紫霄飈車度弱水絳節下陽寥溫潤珠無
類清修玉不雕成家自禱結高節陋琴桃靈匹期河漢
仙槎近斗杓擇夫得溫嶠傳業繼班昭比物能吟絮逢
辰解頌椒早遵王吉儉久去少君驕絳帳詩書在朱絃
律呂調行皆圖史應步節珮環搖林下風姿遠閨中禮

法饒翟衣嚴象服彤史嗣英颺夙御魚軒駕和鳴鳳管
簫清標矜竹潤盛德頌桃夭八桂知同秀三芝等後彫
他年看洗髓終不羨雲翹

偶成

鸞鑑無塵月影圓不須朱粉污紅顏待傳京兆眉
牋樣
剩寫春容入遠山

臉上桃花春自開眉邊柳色日全回遙知弄粉粧成晚
應待溫郎玉鏡臺

樓上東風簾幕垂
纖纖春筍弄粧遲
玉籠鸚鵡知人意
催報花梢日影移

深深小閣夜籠香
日上珠簾逗曉光
為喚羅帷春睡起
翠盆添水試新粧

九日

霜林木葉未全紅
疎雨蕭蕭不滿空
萬里黃花欺病眼
十年烏帽怯秋風
可憐望遠身能健
愈覺追歡歲不同
便欲題詩問鄉國
不堪回首失飛鴻

答鮮于晉伯再用游卧龍山詩韻見贈之什

康成名已滿山東復見談經鄭小同卧病向來嗟髀減
誦詩多謝愈頭風休隨賓客游梁苑合有文章動漢宮
如我空疎已何用上生丘壑坐竒窮

喜王志友來


懶觀南土化歸勒北山銘蠟屐乃相過巾車何不停復
回千里駕去食五侯鯖想見知君到傳呼閣下鈴

恭州教授宋師民有詩次韻

但聞兩廡讀書聲學館無塵地更清歲久緇林皆木拱
春來泮水有芹生剩令龍虎登高第再賦鳧鷖美太平
我老循行才不稱愧君刻畫與虛名

聞伯初兄從周宣諭往兩京

聞道西從使者車殷勤問訊武侯廬卧牛已去多新冢
化鶴重來失舊居草木久荒門外逕塵埃應化壁中書
遙知流落歸無處未免悲歌問孟諸



嵩山集卷十四

欽定四庫全書

集部

嵩山集卷十五至

詳校官起居注主事臣顧宗泰

主事臣呂雲棟覆勘

總校官進士臣繆琪

校對官中書臣王家賓

謄錄監生臣李敷源

欽定四庫全書

嵩山集卷十五

宋 晁公邁 撰

表

眉州到任謝表

列爵惟五朝廷不輕用人近古者三風俗最為務本欲
付牧守之任必得通明之儒夫何選除乃在涼薄

中謝

伏念臣初無時用偶出故家豫臺閣之選者蓋已七人

食郡縣之祿者於焉六世方當門戶寂寥之不振豈意
陛下收拾而無遺近臣兄既執法於中今臣愚復宣化
於外本乏治民之善狀遽叨越次之名邦退而省循何
以報稱此蓋伏遇皇帝陛下儉以富國勞以求賢念喬
木而懷世臣歎西北人才之無幾望中原而思王業乘
東南王氣而有為致令衰宗亦被殊寵臣敢不訪諸耆
舊考所見聞前事可師繼黎錚厚重而無擾大節是慕
如蘇軾剛直之不回

謝太上皇表

始試以政治已下邑之人今得此邦如魯好賢之國豈
其短淺可以撫循中謝臣始者入疆信其近古務本力

作猶有三代漢唐之遺風繫大度長實與兩蜀彭漢之
比郡觀里閭文物之盛被國家教化之多赧然自慚得
此良幸伏遇光堯壽聖太上皇帝德施罔極道合無為
不居成功退捐天下而築特室親授聖子並建豪英以
為官師夫何妄庸亦膺任使臣敢不勉修善政推廣上

心戒諭遠民皆將敬老而知禮追還舊俗益當合耦以
勸耕

賀立皇太子表

太上皇帝

一人元良主茲大器萬世永賴繫我神孫豈徒重太室
之承桃亦以見慈闈之垂裕中賀恭惟光堯壽聖太上
皇帝陛下既底于治不居其功財成以左右民退藏于密
貽謀以燕翼子永孚于休申固慶基式行冊禮臣欣逢

華旦丕舉盛儀乘綠車以從但想日陪於侍衛列黃麾
之仗無緣往預於會朝

今上皇帝

正始王化之基少成於是知禮義太子天下之本豫建
所以尊祖宗因肆宥以施仁示與民之同慶

中賀

恭惟

皇帝陛下祇承慈訓益懋永圖念后稷之艱難自周公
所陳一之日喜王季之壽考見太如之有百斯男眷乃
春坊教之冬籥臣屬居支郡遙想路朝位北上於橫街

初涓是日瞻南向之御坐獨後羣臣

賀冊皇太子禮成表

太上皇帝

宮架三十六簷備樂在庭玉簡七十五枚臨軒授冊蓋

永中興之垂統實繫上聖之貽謀中賀恭惟光堯壽聖

太上皇帝陛下嗣歷無疆德施罔極豈獨受於帝祉蓋將裕於後昆含飴弄孫坐看勝衣之岐嶷持節遣使喜聞奏版之辦嚴眷我慶基安于磐石臣仰知壽考之福

遂及本支之興比宣帝之愛皇孫今為既長見武王之
為世子古蓋未聞

今上皇帝

神器至重長子主之典禮既行天下定矣聖意喜大業
之可託人心知宗豎之有歸傳於邇遐為之鼓舞臣

中

賀
恭惟皇帝陛下懋建上嗣親承慈謨世嫡皇孫知宣

帝之所愛師道教訓必太公之可為豈徒盛有司之儀
更將求端士之助臣屬居支郡阻會路朝設次於重明

門莫觀贊引拜表於文德殿獨後走趨

天申節賀表

養莫大乎天下極其尊崇穆將愉兮上皇享此逸樂載
逢震夙之月無不鼓舞于途中賀恭惟光堯壽聖太上
皇帝陛下儲思穆清貽謀宏遠一日而見三天子當傳
序於無窮大塊之迷七聖人益沖虛而自得臣屬居民
社阻詣闕庭獻禽于大安宮但想君王之致孝放雞於
新豐市莫陪父老之竦觀

又

伏以十四月聖人之生慶闕廟社五十年天子之貴事

冠古今載逢震夙之辰尤極邇遐之喜

中謝

恭惟光堯

壽聖太上皇帝陛下德隆丕祚威格遐荒黃屋非帝堯
之心雖安清靜便橋尋太宗之誓由畏聖明人既賴其
至仁天亦錫之景福宜舉廣樂以彰太平臣屬領州符
阻趨朝列方明為御而昌寓驂乘莫觀物外之游豫章
捧饌而聞喜持鎗但想宮中之樂

提刑司

三聖合符同藝祖太宗之建亥五運垂統適盛德大火
之司辰皇天所開振古未覩臣中賀恭惟光堯壽聖太

上皇帝剛健不息志氣如神有虞氏巍乎其功殆將並
駕廣成子蹶然而起願就下風自得修身之方永享垂
衣之樂臣屬使外服阻趨路朝君子既醉太平無若今
日公卿迭起為壽莫望清光

常平司

四七之際蓋受命而再興億萬斯年當與天而無極每
逢震夙無不詠歌中賀恭惟光堯壽聖太上皇帝陛下
經綸艱難垂裕永久陶鑄堯舜燕翼聖神之子孫軒墀
禹湯下視帝王之功業非特宗廟社稷之保佑亦應天
地神祇之扶持臣屬此按刑稽於就列豈不夙夜庶幾
忠臣之愛君多所平反要助大德之得壽

會慶節賀表

一人挺生天以克肖其德二帝驩樂邦其永孚于休翕

然大和萃於今日臣中賀恭惟皇帝陛下興隆丕祚寅
奉慈謨伊呂伯仲之間求英才而既得文武父子之處
同聖壽於無疆臣不待示宴之慈已備既醉之福雖莫
與玉帛之國翼翼以趨有如聞管籥之音欣欣而喜

又

遷亳居亳再啟興王之符以堯繼堯篤生命世之主惟
天乃眷介福無疆恭惟皇帝陛下仰奉貽謀增隆累洽
無怠無荒而蠻夷服近王近霸而孝悌修自世子而日

朝三今伸以天下之養惟中國之長技五更加以文德之威隱然安強致此寧又某屬膺郡寄阻綴朝班謹舉公等之觴莫聞帝語願使聖人之壽豈止民言

又

十月良月共慶聖人之生一元建元莫窮年紀之數欣逢是日喜溢多方臣

中賀

恭惟皇帝陛下丕承聖謨專

用孝治揜於往古未有前後聖之同時洽此至和遂使大小邦之向道宜膺眷佑永享隆平臣雖阻會朝敢忘

稱頌堯父舜子當同介福之無疆鄭刀宋斤常見銷兵
而不用

提刑司

起於后稷大哉繼繼之無窮生此文王今我聖聖而相
授是日可謂非常之慶上皇如見載育之初喜溢宮中
歡騰海外中賀恭惟皇帝陛下志在復古神惟與能舍
南之光屬天蚤已眷於上帝瀍東之卜惟洛終當邁於
故都豈徒率土之濱欣然而歌又將華封之人舉是以

祝臣宜修職貢屬奉德音臣事君以忠心但勤於馳闕
儀及物曰享幣莫備於充庭

常平司

漢四七之間再見於昭于天之盛舜五十而慕常喜誕
彌厥月之時綿宇詠歌慈閣歡豫 中賀 恭惟皇帝陛下

日聞寶訓益務丕承雞鳴而至寢門何止神於大養鳥
迹之交中國將克定於神州奉迎上皇之歸遂如至德
之世自今以始受天之休臣遙想宸居真為盛事神堯

在坐皆稱萬歲於宮中叔孫為儀更置九行於殿上

大禮進賀表

提刑司

園鍾禮天而函鍾禮地當吉土之肇禋黃金為上而白

金為中宜諸侯之助祭凡修職貢敢後駿奔臣

中賀恭

惟皇帝陛下恭己事親因時報祝日至以出建金支之

秀華禮成而歸奉玉卮而上壽臣屬持旄節阻執豆籩

莫敢來王不能瞻四簋之黍惟恭用幣庶幾同九牧之

金

常平司

四圭有邸以旅上帝式舉大祠九州獻力以共皇天實
為故事適在當郊之歲敢稽享上之儀臣

中賀

恭惟皇

帝陛下因修明裡益顯盛德太和決於穹壤化羣慝於
簫勺之中至誠格於神祇達精意於陶匏之外臣將與
郡縣均被福祥厥貢惟金既已助於毖祀其比如櫛會
當報之豐年

謝賜曆日表

歷象日月星辰使知時令善相原隰土地用勸農功豈
徒太史之常是蓋守臣之職臣中謝恭惟皇帝陛下則

惟順帝統乃得天儉而愛民安肯無益害有益動必合
序未嘗先時不及時凡在照臨皆思宣布臣敢不愈勤
收養勿奪耕耘令正日成不待至於歲會克謹天戒更
當奉於聖謨

又

晨閏分夕閏分惟上聖得推步之正春圖圖秋圖圖使

有司順省繕之宜屬在平反敢忘遵奉

中謝

恭惟皇帝

陛下覆露萬國輯和四時民懷有仁知告以蠶晏之候
王省惟歲至率其大小之臣臣敢不欽誦是書益思其
職萍始生而視原野豈徒溝瀆之皆修麥秋至而斷薄
刑要使狴牢之無滯

嵩山集卷十五

欽定四庫全書

嵩山集卷十六

宋 晁公翹 撰

牋

太上皇后牋

藝祖之祧主此圭瓚拒貞文王之母見我聖子神孫喜

溢宮闈歡傳海宇臣

中賀

恭惟太上皇后殿下王基允

正壺化盛行嗣皇承風豈止於思齊所以聖儲后稟德

能使之習貫若自然臣考所傳聞冠於圖史授太尉冊
於是日已侈宏休著雙童髻於內朝更為盛事

皇后牋

命左庶子之贊拜於是禮成詣大長秋而進名皆當牋
賀中外之慶小大攸同臣中賀恭惟皇后殿下慈教有
成芳猷允塞能推行於坤道以訓迪於震宮迺生而聞
正言蓋自親睽豫建以重宗廟實慰母心臣欣覩昌時
初行盛禮太尉入立於閣外仰璽案之尊嚴司賓引出

於殿前想慈闈之歡喜

皇太子牋

刻白玉之簡持按在前服朱明之衣執珪就位初聞宣
冊莫不屬心某中賀恭惟皇太子殿下孝以事親早於
諭教乃聖乃神乃武資我二帝之文以嫡以長以賢具
此三者之美慶闕廟社望協天人某適在遐陬阻瞻儲
禁諒守宮之設次豈惟官屬之皆來恨分土而剖符獨
望羽儀之莫及

又

以嫡兼以賢當主宗廟之壺抱孫不抱子實慰上皇之
心五學既成萬邦以正某中賀恭惟皇太子殿下溫柔
毓惠敬愛事親出則近於正人入復敷於祖訓昏定晨
省惟堯言堯行可得聞日就月將宜文子文孫所以聖
青宮懋建赤縣歡傳某歎此闕休揜於前古問朝夕於
內御者常視膳於兩宮置左右而帝愛之更承顏於千
歲遭逢盛際鼓舞遠民

狀

貢麩金狀

列聖所貴莫如三品之良舊章攸存願從九牧之貢前
件麩金蓋藏於市非斂於民遺子滿贏皆有富饒之實
與土同價益彰節儉之功

又

天生五材當供有國之用貢惟三品實為麗水所生爰
率邦彛敬歸王府前件麩金利以從革得於披沙象物

以知神女可助夏后之鑄正土而底財賦不須毛伯之求

貢銀絹狀

孝莫大於尊親養以天下物无可以稱德惟我友邦爰率典常恭修職貢前件銀絹本以愛養成此富饒曲薄具而蠶繅盖由齋戒之勸刑罰中則甕出更彰瑞應之圖

又

屬臨彌月山川鬼神莫不寧咸率舊章箱篚幣帛以將
意敬自侯服旅於王庭前件銀絹雖出地征蓋由家給
夜皆識其氣知風俗之不貪冬年號其寒見富饒之足
用

進銀絹狀二

提刑司

帝王之制可舉而行茲為故事天下之物莫稱其德聊
抒下情前件銀絹出於沃饒取以藝極往實作貢之篚

敢後走趨鑄為上壽之鎗永資宴樂

常平司

大哉乾元生民莫報其德養以天下聖子以事其親前
件銀絹本溢於山蓋藏之府仲夏東井正御明堂之朝
大賂南金豈止淮夷之獻

功德疏右語

天申節

為天下君已成功而高蹈祝聖人壽當久視以長生是

惟普率之情莫報生成之施光堯壽聖太上皇帝伏願
年高五帝仁覆萬方廣成子之修身不待其茨之訪道
天可汗之在上永令回紇之畏威

又

彌月既臨凡我尹伯庶常之士即日相率至于浮屠老
子之祠爰設淨筵共祈景貺光堯壽聖太上皇帝伏願
嗣周歷服垂舜衣裳億萬年敬天之休自高上古之壽
七百世守器以正更如聖祖之書

提刑司

太上有立德蓋神祇祖考之皆安率土莫非臣顧嗟嘆
詠歌之不足屬臨彌月往扣真乘光堯壽聖太上皇帝
伏願永御綿區倍膺景福同太祖丁亥之歲生而神靈
推大撓甲子之書周而復始

常平司

天祐聖人不禱祠而福衆於是日皆竭廢以趨凡集梵
宮用祈景貺光堯壽聖太上皇帝伏願巍然高拱樂此

太平游於巖廊而無為常偃萬方之兵革長於上古而
不老親見百世之子孫

會慶節

伏以黃老佛之道歷代之所共尊微盧彭之人祈福於
是有禱恭即誕彌之月相與駿奔於庭皇帝陛下伏願
永享萬年再清四海放牛桃林之野此志必成獻禽大
安之宮其樂無極

又

非常道非常名蓋為清靜之教歸依佛歸依法是謂調御之師可以迎上天之休可以使聖人之壽恭因震夙共効禱祈皇帝陛下伏願神以扶持天所仁愛得其位得其壽固高揜於百王合其德合其明更永臨於萬國

又

黃老子漢而佛于魏蓋自千載而來泗沂入海而渭入河爰盡九州之地共崇其道仰祝吾君皇帝陛下伏願儲思穆清承顏溫清古之胥訓胥保惠永稟德於慈宸

天其命哲命歷年自膺時之純嘏

提刑司

天佑民而作之君篤生是日臣歸美以報其上正在斯
時禱於梵宮介於景福皇帝陛下伏願壽高五帝德被
萬方東面而征南面而征威遂加於不服西海而準北
海而準化當格於無疆

常平司

有王者起蓋不圻疆而赫厥靈為聖人氓固常春秋而

祝於社及履帝武之日願即浮屠之祠皇帝陛下伏願
邦休永孚天壽平格非特致上帝之夢與爾九齡蓋將
同王季之親申以百福

中巖祈雨道場

惟長於千夫百夫若歲大旱乃至於一日二日靡神不
宗終焦槁之未濡凡禱祈而莫應皆謂尊者近在中巖
蓋一念之甚慈兼六通而無礙密雲自西郊不雨能憫
斯時隱雷在南山之陽可召而至敬遣官屬祇設淨筵

顧以守土之拘阻於伏地以請其如激切當即感通

園通道場

惟此封部蓋百乘十萬井之田計其賦輸乃一歲三十
倍於古宜我慈憫念其困窮已於播種立苗之云初救
其旱曠忍見遺秉滯穗之將及使之焦勞願終惠於疲
民想不遺於神力

又

惟聞思修王有大誓願於閻浮提國為衆歸依今我部

封之田遭此旱暵之苦嘗聞神力善救羣生使沸鑊之
湯而化為池不起于坐瀉淨瓶之水而散作雨非有甚
難敢期軫念以垂慈遂即尋聲而赴感

青詞

祈雨設醮

為政不善害於時和自夏以來再以旱告固知上天不
宜屢瀆每念荒年實有可憂豈惟轉車人徒之屬連無
以奉饗亦恐父子兄弟之離散不能為邦願憫夏畦久

勞而未償無使秋稼垂成而或敗歲則大熟民可小康

又

民之貧困未有甚於此時田無斂收則使餓於我土惟
天眷佑以時雨暘乃自是月以來遂致膏澤不下田畝
之苗莫立隄閘之水未通今者部封惕焉憂懼儻三日
之不雨必百穀之無秋如此閔閔農夫丕降汝罪告于
皇皇后帝寧丁我躬吁嗟以祈隕越于下

嵩山集卷十六